

Trer grad agradora

el Tschespet 62: Cun l'auter a pèr/Autobiografia da Vic Hendry; pag. 85

Las personas el text:

- il Vic sez
- la Margreta Cristgina Schmid (1875-1955), maridau Placi Sigisbert Huonder (1868-1946)
- la Meia ei Anna Maria Schmid (1844-1903), maridau igl Aluis, Luis, Hendry (1839-1899)
- la Barla Decurtins (1847-1931), mumma dalla sura Cristgina

«Ti tilas buca ord l'era.»

Jeu fuss pli bugen ius culs mauns en sac; enstagl sun jeu staus lassis ed agradgiu.

«Jeu resdel dils Hendrys ch'ins ha dapi da daditg enneu inculpau ch'els tilien maltscheccamein tut agradora, seigien anetgs e malponderai, els cun lur bucca pleina trasora. — Sas, quella bucca largia e malponderonza derivan dils Schmeds, da tia tatta **Meia**. La **Meia** ei stada la sora da miu bab Tumaisch. Ils Schmeds ed ils Hendrys ein vegni gronds in sper l'auter; igl ei buca iu adina agradora. Jeu sai daplì che ti; quei stat bein si per la detta, enaquella che jeu sun tschunconta onns pli veglia, ni?»

Pren mira; la **Meia** ei stada in carstgaun nervus che saveva far in mument tut sutsura. Miu bab veva malpuccau pil Luis, tiu tat. Quei seigi buca fatg. Il Luis sez ei staus in sco in paun cauld, aschiglioc fuss enzatgi sigliu sur la greppa giu. Ed jeu crei che la **Meia** seigi stada pli ferma e potentia ch'il Luis, tiu tat. **En mintga cass han ils Hendrys artau in detg tschallat dils Schmeds, buca in tanien.**»

La Cristgina dil Plaun sogn Leci fuva vegnida passa ed ella ei seruchegiada per la letga sil bann dado il vitg da Bugnei.

«Nus vein da setrer si nuot, silmeins jeu buc.»

In auto da punt ha spuentsau la penibladad.

«Mes fargliuns ein stai pli mals che jeu; els han tratg plitost la mumma Barla, la Decurtins. Gie tener tschelau e sularar.»

Jeu vai mirau alla Cristgina agraden.

«Mo mira, jeu sun sescaldada e vai tratg agradora e miu um ha fatg sfracs, da Maunsura era. Ils sburfels neu da tia tatta **Meia**, dalla sora da miu bab, cun ils ezs vai jeu giu da sbatter bravamein. Meinsvart fuss ei daveras stau meglier da morder giu osum la lieunga. Il pir, ti, per cass che jeu vai ina ga u l'autra zuppentau vi, vai jeu silsuenter fatg a mi unviars.»

La Cristgina dil Plaun sogn Leci ei ida naven, suls cuolms vi, ed jeu vai mirau suenter; la bucca largia ha ella schau a mi e mintgaton vai jeu tondanavon da schuffa. E cun dar la cuolpa alla tatta **Meia** vegn jeu matei buca a vegnir suroravi.